

Trabaonan a cuminza ayera:

ISLA DI ORO LO BIRA DOLPHIN BEACH

ORANJESTAD (AAN) - Un compania local, hunto cu un socio internacional a cumpra "Isla di Oro" cual ta bay bira un "Dolphin Beach", cual por bisa ta un proyecto unico den e region. Muy pronto trabaonan di construcccion lo cuminza duna contenido na e proyecto magestuoso aki.

Ta asina cu e socio, cu ta un empresa Merciano ta desaroja programanan na Florida, unda e dolfinan ta capta atencion di e muchanan cu tin problema y poco poco ta logra pa e pacientenan bira mas expresivo. E tratamiento aki ta dunando hopi bon resultado na Merca.

NA ARUBA


E proyecto na Aruba, unda masha poco por tende di muchanan autista, ta bay mas

bien pa duna e poblacion en general, logicamente pensando riba nos muchanan, e oportunidad di disfruta di un dia completo di actividad, algo diferente, nunca antes bisto den e Isla.

Ademas di e poblacion local tambe a pensa riba e impacto cu tal proyecto ta bay causa den e sector di turismo.

E plan tin envolvi den dje un compleho precioso e interesante. Check Point Color ta e compania encarga cu sacamento di potret y video di promocion. Lo conta cu restaurant pa lunch y dinner, bar, lugar pa benta di souvenir, facilidad pa deportenan acuatico, entre otro.

E base di e proyecto ta pa Aruba dispone di un lugar tipico, natural, y accesible pa tur hende. Tin pensa di cobra prijs di 3 Florin pa entrada.



DOLFIN: UN ANIMAL "MAGICO"

Ta conoci cu e dolfinnan of cacho di awa manera ta ser conoci na Aruba, ta animalnan cu tin "magia" pa atrae atencion di grandi y chiquitonan.

Incluso na Merca tin programanan special pa prepara hende muher na estado pa ora di duna luz, a traves di show di cacho di awa, cual ta yuda tranquiliza e persona.

Ya caba tin seis dolfin entrena na Merca pa e proyecto na Aruba, y na Sonesta Island lo bay tin 12 cacho di awa mas cu lo worde entrena, y alavez pa nan mes custumbra cu lama di Aruba y adapta nan mes na nan "cas nobo".